

楊楚孫先生詩集

中華民國六十六年五月出版

近代中國史料叢刊續編 第四十二輯

精裝：十冊

定價：新台幣



主編者：沈

雲龍

發行人：李

振華

出版者：文海出版社有限公司

臺北縣永和鎮中興街99巷8號

郵政劃撥戶第二七八四號

電話：九二一二六五九號  
三四一六九二八號

印刷者：東南印製廠有限公司

台北市西園路294巷15弄17號

經銷者：全省各大書局

行政院新聞局出版事業登記證局版台業字第〇四四九號

本書承

楊愷齡代表惠借景印特此致謝

文海出版社謹啓

序

孫子伯亮既寫印其師慨翁詩錄後編印楊楚孫先生詩集三卷屬  
余為之序伯亮師事楚孫年未弱冠耳濡目染故能詩顧楚孫留心  
經世之學吟詠非所措意隨作隨棄不自珍惜積稿雖多叠經變亂  
伯亮網羅搜別得詩二百二十首以視吾兄慨翁所留遺者猶多楚  
孫有知當笑吾道之不孤衣鉢之有屬可以少慰也余識楚孫在五  
十年前應縣試與連號知其能作試帖詩及府試毘陵竹枝詞出詩  
名籍甚既冠一軍題扇見贈有句云一曲竹枝傾太守如何顛倒置  
龍頭自謙亦自豪也嗣後衣食奔走天各一方居東時三島詩人交  
口稱譽目為泰斗而郁受院威倚南黃任軒諸子各逞詞華結社唱酬一時

稱盛楚孫為同社推重實主盟馬所作既富可傳之作亦於此時為多蓋楚孫天才高人一等其為詩也不傍門戶不拘繩墨與之所至筆亦隨之而抑鬱不平之氣時流露紙墨間故歌行尤勝梁溪多詩人近數十年來無與抗手惜中年而後以報人自居不獲少展抱負倘所謂詩人少達而多窮與楚孫於詩古文辭根柢深穩駢散文皆有法度為余序俠骨恩仇錄一文已膾炙人口足徵散佚者不知凡幾當語伯亮廣為徵集俾與詩集並垂不朽伯亮倘矧余言是為序

中華民國三十六年歲次丁亥同邑蒲石居士孫肇圻

楊楚孫先生詩集總目

第一卷古近體詩七十一首

北京作 里門作 南京作 常州作 北京作 上海作

第二卷古近體詩六十一首

日本作

第三卷古近體詩八十八首

北京作 里門作

凡三卷共詩二百二十首

先生作詩往往隨手拋棄或付之報章雜誌不自存稿此二百餘首除丙午前諸作外多數錄自報誌即以報誌刊載之年月為次編訂三卷大體尚不致過於錯亂惟丁丑之厄報誌散亡搜羅匪易抑且遺佚多寡末由懸揣頗引為憾耳按先生始從事新聞事業於清季乙巳之秋庚戌辛亥間則于役北京民元

壬子歸里與同志者合創錫報旋獨辦新無錫報故先生之詩  
辛亥後所作特少蓋方傾全力於報事以報人自視吟弄遂疎  
也是編承先生親友吳稚暉李柏森華洪濤蔡漱岑蔡稚岑陶  
君武張次清程景溪侯暉華楊愷齡丁半梅諸公出資相助得  
付梓人則距先生之歿忽忽十年矣爰附數言以為誦先生詩  
者告焉丁亥夏日門人孫伯亮謹記

楊楚孫先生詩集卷一

無錫楊壽杓少雲

別署蘅意  
一署楚孫

門人孫伯亮編訂

東村避兵起庚子

一覽京華夢東村寄此身訛言傳野老時事問途人家國悲無著安  
危聽不真鄰翁多逸趣把酒話相親  
感時空有淚遠害喜無官野味嘗來苦征塵話亦酸途窮多鬼域地  
僻厭衣冠一襟中秋月今年不忍看

西狩

薊門煙樹西風老中原王氣已如掃黃金臺上烏鴉啼禾黍離離遠  
古道道旁父老語行人此地昨見翠華巡秋月無光旌旗黑千騎萬

騎夜嚮晨依稀聞是漢天子為避匈奴西行此聽說今年夏五月黃  
天當立蒼天死妖言遽起動關中黃巾如蟻來山東撤盡藩籬尚驕  
敵一戰再戰不成功無謀董卓火洛陽禁城幾見成沙場柱國蕭曹  
諫不錄擁兵產祿死猶狂勢窮理拙難措手神仙弟子曳兵走紛紛  
人自日邊來皆言親見帝與后布衣帛冠忙忙行吞聲掩面出西城  
與吾所言通相合干戈從此何時平回憶當年建邦土聖神相繼更  
文武相傳八九漸陵夷中興以後多鞏鼓鞏鼓連年至此時炎炎紅  
日將西馳前年有牛鳴水底今年四月雪花垂天地反常乃告警沈  
幾觀變問為誰和戎五臣已就戮驕兵三帥今何之坐看長城墜萬  
里銅駝荆棘見於斯父老言罷我太息嗚呼何以再為國嗚呼何以

再為國或在宵衣與旰食

西望

葱龍雲樹鬱清秋西望京華涕泗流  
寇至聊同曾子去才疏空作杞  
人憂旌旂影落新屯壘烽火痕餘古  
戍樓翹首臨風搔短鬢離離禾  
黍不勝愁

抒憤

男兒安得手持哥舒半段槍  
星高月黑巡邊夜獨向沙場  
能使牧馬胡兒膽盡裂  
臨洮年年不見煙塵揚  
中原大事今去矣  
長城汝自壞  
萬里車駕長行西復西  
銅駝淚灑秋風裏  
獨有江東年少客  
憔悴京華悲浪迹  
救時無計空哀吟  
淋漓熱血腔中格  
悲乎哉去年今日正

覽江山形勝來今年今日徒抱滄桑變幻哀昂頭天外作龍吼凌風  
飛上黃金臺當今有誰特置千金延攬天下士得一深山窮谷達時  
濟變之奇才

滬江旅舍題壁

鋒鏑叢中得命回北征一曲使人哀春申江上花如錦莫羨劉郎今  
又來

獨憐申水太多情兩度相勞接送行此去到家三百里東流莫作斷  
腸聲

疏櫺十二月如鈞人面依稀隱隔樓今日樓空人已去重來崔護不  
勝愁

庚子十月十八日還家誌喜

業業抵家門到門不敢入急呼高堂親相見吞聲泣弱妹連呼兄淚  
珠拋粒粒妻子走倉皇覩面轉木立稚女牽母衣固問是何客戚友  
從外來奔視氣呼吸都言期汝死喜極反歎息環立問京師指畫窮  
口給十手莫形容百口難分析夜坐道家常一一從頭說魂驚心不  
定往事猶歷歷微倖慶生還不堪回首憶

謝公墩

滕王高閣岳陽樓風流文采千萬秋斷碑古碣後人撫於今猶枕寒  
江流卓哉東山謝太傅雅量高致猿鶴儔有墩東山山之下松楸業  
業白雲留白雲一去成終古六朝山色青無主莫酬太傅霖雨心剩

此東山一坏土我上謝公墩舊蹟今猶存江山自今古煙樹瘴朝昏  
昔聞魑魅鼎傳九地老天荒鼎未朽東山遺愛今無他自古千金一  
敝帚我來弔古吐長虹前人先我寄吟筒彼何人斯有古癖青蓮學  
士王荆公

項羽井

君不見歌風臺片瓦零落埋蒿萊又不見穀城石草色苔花空一碧  
烏江流水咽無聲英雄自是天生成斬蛇逐鹿一事耳彼胡為者成  
功名昔成功名今畫餅項王莫悲漢莫逞萬里山河四百年千秋萬  
歲一古井

昆陵竹枝詞

十二首  
賸五

蘭陵風景細平章莫向新豐買酒嘗一色青旂楊柳綠家家春釀鬱  
金香

多少遊人繫紫騮春風吹上岳陽樓看他嬌小當壚婦絕似成都賣  
酒儔

十丈龍舟戲水來白雲沒口錦屏開萬千綠隊紅羣裏亂擲金錢賞  
奪魁

荒碑臥碣舊時宮衰草平蕪一望中不見錦帆天子到冷螢夜夜逐  
秋風

鍾期一去伯牙哀瀆上相傳舊有臺流水高山誰弔古郡人浪說抱  
琴來

滬江旅次送范新周游學倫敦起甲辰

君自乘槎去吾將越海游離情縈北地別夢寄歐洲意氣哥倫布功名定遠侯故鄉何日返同眺二泉秋

黃白種相阨神州慘陸沈好將醫國手堅抱濟時心學界深於海華年貴似金欲酬孤矢願共體此長吟

京邸月夜感懷與秦仲實分韻仿李義山體

銀蟾璀璨漏聲遙愁思無端午夜潮到處蘭因成絮果頻年錦瑟怨文蕭行雲若夢拋紅豆捲雨無心寄綠蕉底事閒情能鑄淚珍珠零落濕鮫綃

宣南卽事示友人三首

領取尊前一曲歌含情脈脈託微波琵琶訴盡天涯怨贏得青衫濕  
淚多

環肥燕瘦總相宜况復清歌賽雪兒君愛春蘭我秋菊一般都是好  
花時

恆河沙數種情根一滴龍華品不尊安得諸天齊護法扶持仙女散  
花魂

### 易水懷古

士不屠龍且屠狗酣歌日飲燕市酒丈夫豈易身許人大義久矣無  
強秦易水湯湯漾寒碧壯士西行髯如戟白虹天矯風酸嘶悲歌已  
奪秦王魄樊將軍頭膏亢圖圖中有物不盈尺人頭怒目睨匕首區

區不是相如壁滿殿忽聞蛟血腥驚天霹靂騰秦庭秦臣大呼王負  
劍功敗垂成死不瞑博浪沙中有繼起吁嗟慷慨兩俠士一書韓人  
一書盜成敗論人宋儒史千秋莫雪荆卿冤終古寒風易水汜

喜曹夢漁至京與秦仲實夜坐談詩

江山憔悴悲詞客風雨淒其對故人旅火夜涼秋似水新詩為洗北  
來塵

扶衰健筆肖昌黎若論才華讓玉溪相對令人慚飯顆秋宵剪燭客  
窗西

七夕

花陰寂寂月溶溶悵望銀河隔萬重那有心情祀牛女他鄉瓜果正

愁儂

蛾眉新月一鉤纖  
今夕天孫啟鏡奩  
滄海路遙銀漢近  
有人愁下水

晶簾

秋夜

宵涼白袷軒軒舉  
秋瘦於人秋幾許  
手剔銀荷有所思  
一蟲如訴牆

東語

客中雜感

吟懷清減旅愁多  
老樹秋聲和踏歌  
衰柳腰支憐病骨  
飄萍身世感流波  
市中未聽漸離筑  
天上驚傳織女梭  
欲憶江南翻舊曲  
漫言游子意如何

萬方多難我何之  
憔悴京華有所思  
早歲文章貂尾賤  
少年情性虎頭癡  
不投健筆羞捫蝨  
誰叩晨鐘警睡獅  
此意自憐還自惜  
秋心揉碎莫題詩

遣懷聊逐牧之游  
子夜歌聲似昔不  
玉樹餘音亡國恨  
旗亭絕句動邊愁  
眉山古惜胭脂失  
青塚今貽粉黛羞  
若箇美人多俠骨  
傷心無復媚香樓

不信家書抵萬金  
開緘帳觸旅人心  
高堂白髮闈中思  
故國青山夢裏尋  
千里鄉情縈夜火  
幾番涼信動秋砧  
遣愁偏耐宵寒坐  
鐵馬低敲玉漏沈

煤山懷古

煤山傑閣鎖煙霞風景依稀認漢家  
異讖當年飛燕子傷心故國殉  
梅花頽垣亂草鳴寒織古樹斜陽宿暮鴉  
猶說王孫延絕世青門蕭瑟種秋瓜

讀華若溪先生秦仲子八月十五夜詩  
張觸旅懷兩和其韻

京華曾記劍橫磨霧踏銀河水不波  
前度中秋成夢幻今宵明月擁愁過  
沈沈畫角溶溶夜耿耿繁星踏踏歌  
照徧流黃紫舊恨曼聲休唱憶秦娥

秋風零落五陵鞍步月思家淚暗彈  
顧影自憐奇骨瘦倚欄誰惜袷衣單  
詩魂散地侵人冷鄉夢連宵怯夜寒  
解憶長安兒女小閨中知有幾人看

無題

故園紅豆正離離，爭說長卿又化棋。  
一縷秋心如夢令，二分明月誤佳期。  
閒情擬託靈犀逗，渴病難教扁鵲羣。  
玉山頭人不見，仙雲應傍翠環欹。

醉後夜歸秦君通理以詩思艱澀相嘲賦二絕句答之

有酒如淮興未央，劉伶放誕謫仙狂。  
秋來多少驚人句，半付愁鄉半

醉鄉

詩城割據欺長吉，酒壘縱橫壓步兵。  
酌彼金罍君莫笑，新詞聊復解餘醒。

宿醒未解秋月猶明，再疊華若溪先生秦仲子八月十五夜韻

吳鈞襲月倩誰磨歇絕雄心古井波三載良宵愁裏度卅年塵夢醉  
中過鈞天奏樂雲和曲歸路乘風水調歌狂唱謫仙將進酒繞梁餘  
韻逐韓娥

荷肩酒鎚壓吟鞍私譜霓裳對月彈桂窟游仙重闕迫羽衣醉舞五  
銖單欲偷靈藥瓊樓遠憶搗元霜玉杆寒咫尺蟾宮飛不到人間聊  
把酒杯看

腐鼠行

宵闌漏永燈微明欲寐不寐夢未成萬籟無聲客心寂牀頭羣鼠縱  
橫行隔幃瞰人目如漆蠢茲醜類機械萌嘯聚聞聞若怨詈盍撲此  
獠殺此僇舉枕欲投忽忘器腐鼠相嚇安足驚君不見周處當年積

不平手除三害成功名吁嗟鼠輩毋復爾乃公借汝礪平生

偶成

久客驚秋老孤燈逗晚涼鄉心半輪月歸夢五更霜旅館愁長夜鄰  
家話隔牆有懷殊未已明日是重陽

九日

流年似水去滔滔回首西風惜鬢毛詩律近因愁入古酒樓誰與客  
登高心隨榆塞天邊雁夢斷吳淞江上螿世事先秋零落盡黃花笑  
我不如陶

晚步偕秦仲子至陶然亭復登南城遠眺

放步江亭去行吟水一方路紆穿白華寺遠見紅牆生意畦蔬澗清

心野茗香登臨同寄嘯秋思入微茫

送佑之侄之官湖北便道歸揚州挈眷

夜坐待晨鐘清談興轉濃  
今宵從此別何日再相逢  
楚水程千里揚州夢幾重  
鳳毛希世貴仁望振吾宗

十月十四夜坐望月示從侄承勳一首

銀蟾吐魄下簾旌千里鄉心一夕生  
誤認團圓疑此夜空留色相動人情  
流輝凍地尋無迹幽籟驚宵聽有聲  
汝亦盈盈將十五年華頰共月華清

城西招提書所見

內家裝束總宜人翻若鶯鷓門洛神  
莫是慈悲空色相白蓮花現女

郎身

春痕紅上海棠枝帶雨籠煙絕世姿祇許一陽描倩影花陰小立不多時

蔣烈女歌并引

庚子拳匪事敗秋七月京師陷吾鄉蔣烈女以父官寓河尉  
依母居都下見事變倉卒諷母挈弟若妹避寇去恐纖弱為  
行者累從容仰藥死內衣密縫若組織然家人瘞之後院亂  
平改葬屍不變如生聞其烈於朝士大夫競以文詞褒之嗚  
呼是歲之秋都中士女死於難者蓋夥然皆被胡騎蹂躪且  
兼蒙慘垢者泰山鴻毛之別識者領之矣或曰烈女曾割股

以療母疾則奇忠奇孝之行殆由其稟賦獨靈歟抑又聞之  
吾鄉昔號梁鴻溪為古賢女孟光舊居之地意者山水靈郁  
乃生奇女子歟吾友鄧君範欽與烈女父攬澄先生善最余  
為歌行紀其事爰誌其梗概如此

維庚子年秋七月沴氣羶腥鬱胡羯狼烽夜火春明門豺虎縱橫鬼  
出沒可憐士女混蟲沙血花亂濺凌波鞦韆蔣家有女人中英能以冰  
心被慧宇父官甯河半載餘烽煙三月無家書慈母蕭條弟妹小一  
門細弱長安居深閨驚聽銀銜撒揉碎芳心化碧血密縫衣衽無人  
知從容泣向高堂說母攜弟去勿攜女賊來女自有所處百轉千回  
志不移母號弟哭女無語入房潛飲阿芙蓉女郎慷慨殉金塘亂中

藁葬香閨側秋風長夜悲寒蛩父歸已不見之子空惜紅顏黃土裏  
桐館改葬啟封時女貌如生女不死我於是年居帝京親觀祠火聽  
狐鳴西來胡兒健如虎一夜城東死鼓聲索索伏屍不可數男女錯  
雜街衢橫萬死不如烈女死泰山之重鴻毛輕况聞女昔承歡日曾  
刻左臂療親疾猶以當時割股心甘將一死完瑤質女家舊本號梁  
溪古有賢女梁鴻妻毋乃山水孕菁秀不毓冠帶鍾珣笄吁嗟乎清  
風嶺上詩傳久露筋祠畔碑刊蚪熒熒燐火北邙山惟有蛾眉死不  
朽奇烈已蒙天語旌芳名應嗣諸姬後長歌當哭弔貞魂貞魂今日  
還知否

哭華若溪徵君世芳

老輩風流匪所思那堪回首去年時  
看花每許隨藜杖詠月曾教和  
竹枝塵海自憐知我少異鄉  
寧悔識公遲先生今主芙蓉去從此天  
涯更屬誰

箕尾流光照大荒風騷無主我心傷  
立名不朽時人傳遺世應游帝  
子鄉書法空懷蘇玉局畫宗竟失米襄陽  
春來綠徧鵝湖水歸去魂  
當化鶴翔

前宵夢別話相親千里歸魂幻作真  
湖海游蹤成泡影屋梁落月想  
丰神過江名士無餘子故國青山失主人  
賸有百株桃李樹森森新  
綠鳳城春

莫譏陶令賦閒情若箇旗亭著艷名  
南國無人能拔幟北方有女自

傾城白頭紅粉稱雙絕劍膽琴心證一生今日春明門畔月嬋娟不似舊時清

枕上默誦近作口占

海山蒼莽水仙歌播入希夷逸響和儘有知音解琴意囊殘桐尾已無多

江南春

燕臺浪游子云是江南人餞春曾別江南去懷人猛憶江南春江南春色去年好春易飄零人易老今年春色去年人人去春來感懷抱懷抱春愁寄阿誰杜鵑驚夢啼春悲不如歸去聲聲喚使待人歸春已遲美人遲暮春無主鮫珠錯落如春雨不知人有幾多愁但覺春

光變今古人為傷春感慨多  
魂銷南浦舊時波  
春波綠遍江南水  
飛度天涯春夢婆  
天涯人倚東風醉  
萬紫千紅門春媚  
祇恐春歸人不歸  
游蹤亂逐飛花墜  
君不見相思豆  
子紅離離盡是游  
人眼中淚

感詠

旅况蕭然付濁醅  
金裘零落病燕臺  
故園松菊秋無恙  
欲賦淵明歸去來

歲月侵人短髮增  
頻年行脚似孤僧  
囊桐身世無窮感  
莫向天涯問廣陵

一秋苦雨感相如  
潦倒愁鄉賦索居  
行箇詩文休浪播  
故人傳編絕交書

縫衣京洛悵前遊  
秋老寒生季子裘  
又是重陽時節近  
滿城風雨助人愁

子美窮愁不廢詞  
長饒遙寄七哀詩  
飄零萍迹三千里  
秋盡江南夢未知

不惜紅綃買艷歌  
章臺走馬意如何  
浮萍飄泊楊花舞  
分占愁心若箇多

羽書飛集漢家營  
幕府猶談紙上兵  
寄旅情懷關塞怨  
宵涼風雨鼓鼙聲

惆悵吾生未有涯  
窮途欲駕步兵車  
消愁知有愁多少  
要問長安賣酒家

贈范三

曾說風塵閱歷來南浮湘水北燕臺只嫌未入邯鄲道夢裏封侯去  
一回

君如欲訪赤松子我亦將尋黃石公從此不談天下事結廬同住萬

山中

滬上贈孫頌陀筆圻

海上青琴尾已焦曲高空咽廣陵潮十年舊雨渾如夢雙對寒燈話

幾宵

往事如煙那可憑商量舊學憶蘭陵幾人肝膽供談笑入世還當共

飲冰

北邱山北多新鬼說到前游一愴神  
淮海心情最相憶白楊黃土哭  
斯人

十丈紅塵貼地鋪小車扶醉認歸途  
百年對酒如今日不識黃金買  
得無

曾經滄海小波瀾杜牧揚州夢已殘  
別有情懷向君說好花多半露  
中看

明朝珍重是歸期短調難賡古別離  
載上輕車勤護惜丹楓旋淚故  
人詩

楊楚孫先生詩集卷二

無錫楊壽杓少雲

別署蘄意  
一君楚孫

門人孫伯亮編訂

舟次日本長崎起丁未

去去之東國舟行浪氣腥壯懷煙水闊孤嘯海天冥樓櫓日邊盡  
田疇山際青神州西睇遠舷外見秋星

月夜有懷

一雨洗空清高樓望月明悲笳吹夜動寒緯應秋鳴黃葉鄉關夢青  
萍海國情美人天末遠衣帶水盈盈

黃任軒曰律細調高  
酷似丁卯橋集中物

雁

寥天遙睇雁行稀獨立層樓一振衣昨日作書寄家去鄉心又逐汝

南飛

秋興八首用杜子美韻

楓霜桂露憶園林  
小住瀛壺氣蔚森  
一萼經天搖夜動  
萬山呼雨作秋陰  
偏生王粲登樓感  
未死田橫蹈海心  
臥看月明聞曉角  
不多鄉思到清砧

銀蟾吐魄玉杵斜  
明鏡朱顏惜鬢華  
烏訪安期搜秘笈  
石貽博望託靈槎  
倚樓淚迸中宵笛  
去國愁聞午夜笳  
叢菊故園秋晚晚  
幾人把酒醉黃花

烏雲蚤氣黯斜暉  
百感蒼茫入暮微  
鄉國有懷青鳥至  
水天無際白鷗飛  
千童渡海功猶在  
四郡分韓事已違  
秋草榆關東去路  
漢家塞

上馬空肥

幕府經綸別墅棋關河秋色動人悲鯢鵬海上圖南日蟋蟀堂前戰  
北時世事轉隨霜信早鄉書來比雁賓遲連宵妖字躔牛斗露坐觀  
星一繫思

舊遊回憶薊門山慷慨悲歌燕趙間北地秋風悲漢塞中原王氣莽  
秦關空羣自相無奇骨入市論交有醉顏曾見金臺遺址在往來樵  
牧尚成班

澧蘭幼擷楚江頭歸棹瀟湘八月秋黃口昔吞雲夢氣青衫今抱汨  
羅愁逐臣舊宅巢林鳥帝子靈旗管水鷗回首洞庭波渺渺哀箏夜

按古涼州

天塹誰旌戰伐功  
秣陵王氣有無中  
寒生江上楓餐露  
秋到城邊柳臥風  
玉樹凋零衰草白  
錦帆想像夕陽紅  
水村山郭南朝路  
今古興亡問釣翁

昭回雲漢亘天遙  
海國秋成水滿陂  
旅興鷗眠紅蓼浦  
騷情蟬抱白楊枝  
十年作客風塵老  
萬里辭鄉歲月移  
誦得草堂詩卷句  
綠纓涕淚數行垂

卽事

旅懷  
根觸萬更裘  
客到重陽怕倚樓  
孤負鄉關好風味  
青菱黃粟二泉秋

戊申三十日懺六首

行年三十尚風塵攬鏡還疑我未真身世豈宜長作客才華漸覺不  
如人酒瓢積淚無家國筆塚埋愁有鬼神渺渺滄波遊子夢孤燈照  
影自相親

十八年前淚已枯秋雲稚子墓門呼涓埃未報猶行役骨肉無多况  
少孤栗里田園長落窳瀧岡松柏久荒蕪他鄉最怕清明近處處春  
山叫鷓鴣

風雨難鳴不可尋焦桐清響感銷沈浮雲薄薄人間意流水湯湯海  
上心後日最難酬一飯當年何苦散千金阮郎莫作窮途哭世路多  
歧自古今

萬疊煙雲眼底過漫言華髮綠盤陀生於安樂人原少數到交游鬼

已多白日催年春晚晚黃塵逐夢客蹉跎天涯有地容萍迹勘破淨  
沈付醉歌

哀樂於今漸莫支是非都付少年時佯狂自頌劉伶酒小詠人傳畢  
曜詩過去繁華天不悔未來歡笑我何知振衣西望蓬山外雲樹江  
關日暮思

吾生有盡且為歡一卷南華悟達觀客况何須分苦樂家書總諱說  
艱難眼前春色憑花笑物外人情當夢看綺歲風懷刪欲盡卅年歌  
哭太無端

登愛宕邱望海示同游黃任軒

入山何必深乘興偶戾止天風吹我衣俯視見城市地高塵自遠人

逸心乃喜悠然望東海非曰濠梁比輕帆小於葉三五煙波裏浩渺  
豈無涯吾道在觀水退坐綠陰中同證妙明理斜陽穿樹來幽籟蕭  
蕭起日暮不可留斯遊曷云已何嘗買林泉歸去陶潛里

聽雨

銀河澹影臥層樓孤寂渾如野渡舟半枕輕寒侵曉雨一聲聲似替  
人愁

簡松田老人

松田先生東海儒性不諧俗雲林迂平生詩品見神逸一泓秋水鑑  
塵無我來東邦旣一載晨星寥落吟朋孤黃生軒任為我總角友偶然  
得句走相呼攬我新詩獻詩佛佛因詩果豚魚乎先生論詩重神骨

法門廣大容狂奴品題稱我詩有律相馬得驚竄非誣我謂先生得  
詩趣短襲子美長攻蘇娟如秋雲拂林木矯如龍爪探領珠神交未  
識先生面夢魂恍見貌清癯興來落筆賦長句萬籟幽寂吾心徂昂  
頭忽悟靜妙理繁星耿耿明庭梧

附酬詩

松田定久 舟山

名賢自古多出吳風流不盡文采殊黃子楊子復秀出才藻不忝  
機雲徒二子先後探東海應使波底無遺珠楊子詩好始得見其  
品高雅其味腴才大奄有衆美具儼然詩國非苦邾絳霞千段明  
赤城碧湖萬頃開太湖月露時寫兒女語風雲倏變英雄呼攀鱗  
附驥我有願翰場敢擬連鑣驅瘦苦枉類飯顆杜神逸何望眉山

蘇張翰魯望不可見懸劍公子今有無願從二子寫吾臆筆硯庶  
免荒且蕪

秋暮由家再渡東海海舶解維有感口占

白巾亂舞舟初動但見江千萬手招笑我頓忘同是客看人離別轉  
魂銷

黃海中大風浪

臥不成眠俯聽風海聲如吼捲長空十年蕩子流離感都在波濤澎  
湃中

冬夜感懷

凍星當戶曠窺我作僧趺偶聽兒童語偏驚歲月徂雲山千里外風

雪一身孤此夜悲生事寒燈照夢無

家鄉書不至歲暮易蹉跎感我客中意征鴻天外過貧交今日少好  
夢故園多有女能脩札塗鴉近若何

己酉春日偶書

穉綠新紅到眼前嬉春猶怯曉寒天鄉心早逐葭灰動故國梅花又  
一年

宋徽宗畫鷹

俊物非凡色相殊君王妙筆寫成圖中原當日多狐兔曾見神鷹一  
擊無

題松田舟山笳音集後

意氣飛揚舞兩驂才人何惜鬢髮悲涼一卷茄音集垂老談兵陸

劍南

中原誰唱古輪臺不見嫫姚出塞回一讀君詩悲故國盧龍胡馬踏

沙來

落日

金烏匿景下崦嵫悵望鄉關有所思莫問鄧林遺杖事鼎湖弓劍去

多時

酬郁廉遜

富春山水聞天下昔有高人嚴子陵漫指客星懷隱士喜從異國遇

良朋萬金寶劍鋒難逼三尺孤桐直可繩刀割紫雲龍種草抗君才

調我何嘗

附贈作

郝華曼陀

君能僦僕我能狂  
貧賤論交各自傷  
馬骨千金同遇晚  
虎頭三絕獨才長  
直空城府肝成鐵  
柔化文章指繞鋼  
隕石江南星似雨  
赤符中夜拜詩王

春晴

睡醒庭柯鳥弄聲  
搖搖花影上簾旌  
天憐三月開新霽  
人醉重陰解宿醒  
芳草郊原初試馬  
綠楊城郭始聞鶯  
櫻桃經雨紅纔蕾  
好向長堤載酒行

松田舟山見訪且惠詩牋一匣賦寄四首

虛谷楚然有足音  
晁王交誼感苔岑  
一天雪霽高軒過  
淺印春泥屐齒深

滔滔今古數人才  
雄辯翻瀾雅量恢

舟山歷舉唐宋及近代詩人相詰

五十豪情猶未

減詩城割據門兵來

慚愧先生解杖頭  
鸞箋貽我意綢繆  
銀光百疊容揮灑  
只恨才非五

鳳樓

一識荊州喜欲顛  
風塵傾倒李青蓮  
送行詩句今猶在  
初定神交憶

去年

余去歲歸國家賦詩送行

報訪松田老人卽席賦一絕句

池上高人茅結廬  
池中行藻帶芙蓉  
謝家詩句傳春草  
閉戶還編種

樹書

舟山精研植物學時有著述其居在不忍池畔終身不娶詠詩自樂殆東方之隱君子也

懷洞庭一首贈威倚南

我生懷洞庭竹馬酣嬉時江山賈傅宅雲樹湘君祠才人渺難得瑤瑟哀以思豈無芷蘭感所惜方童兒悠悠二十載魂魄縈江蘼東海達楚狂如與故人期問訊釣游地今昔風俗移平生慨世變聞此悽心脾緬彼衡山雲終古芙蓉姿三閭摘其華乃為離騷詞吾子才清發拾得靈均遺落霞明沅浦晴嵐開九嶷秋水溯伊人宛在瀟湘湄吳楚非云遠地坼東南陞况今同異國昕夕蘭襟披賞心焉能忘良會逝莫追抗懷郢中曲遐想託希夷

附酬詩

威時麻生

讀君詩句靈珠圓服君詩壘長城堅才薄懼為賢者鄙懷刺欲竭  
心茫然高軒夜碾昌谷夢通辭辱貶洞庭篇朱絃疏越憂奇響溫  
如玉氣敲藍田歛如金蛇掣寒碧秋龍掀雨雷填填返神再讀蘭  
馨發鄉心搖作湘螺煙春寒襲酒孤雲細招尋今雨鶯翩躚韻流  
風發騁白戰筆花怒放青霞笈夜深談鬼燭光黑鯤雞一聲啼曙  
邊輪囷肝膽照白日看君射虎南山前高歌鬱鬱動牛斗有時枯  
寂如逃禪愁來獨眠中放龜醉倒不上青蓮船詩才譽我玉溪李  
誰其匹者空時賢便欲拂衣買滄海歸去飲我慧山泉感君意氣  
翹首立白雲蓬蓬團樹顛文章後世誰知定古來名士皆迷蓮鏡  
中秋眉換柔綠黃塵跣跋遊屐穿高堂置酒不得意出門且拂珊

瑚鞭雜花解樹禽將子春痕夢墜枕柳天鴉天彭蒿俱灰劫丹訣  
誰傳駐大年會須歸種門前柳不然出絳杖頭錢胡為於邑銷奇  
骨終日坎壤浮生纏

香

博山無夢有雲行鵲腦相思記艷名生本憐才韓掾貌死猶分愛魏  
王情簾中絮影三春幻枕上梅魂一縷輕永夜頻添紅袖冷微風庭  
院月初明

酬黃任軒

君家山谷學杜甫浣花水注涪江滿君才俊逸如謫仙不陟飯顛宗  
青蓮鳳凰飢啄琅玕食秦桑燕草思羊綿論詩回憶垂髫日釣游同

時皆妙年當年鄉井未離析君唱陽關我吹笛鞦韆花影詠春愁往  
事凝眸猶歷歷我遊京國初別君感君送我荅湖濱驪歌低咽慧泉  
水交情遙指龍山雲京國明年舉烽火遊子還鄉避兵禍相逢便索  
亂中詩風塵駢君知我從此音塵重隔絕同是天涯五載別一夕  
神風引客舟逢君東海蘭襟結君言避世深山深莓苔一徑無人尋  
晨星寥落哀君語舊雨纏綿悽我心聞有碩人在澗阿長鏡久伴君  
行歌我因黃石識松子曉窗風雨難鳴多嶧桐柯竹愛同調邂逅無  
心遇張劭郢中歌者抱琴來富春詞客最年少人生離合多變更日  
月淹忽東西行少年結客在肝膽意氣一擲黃金輕文章憎命不須  
數舊游回首悲平生此時追念昔時事他日還思今日情

附贈作

黃以仁子彥

子美苦吟身當世少知己師表千餘年晚乃得楊子楊子詩何雄  
八代任驅使細者入無間鉅者擴無涘淵淵金石聲頃復歸純理  
其格高蘇陸欲逼杜陵壘繫余總角交見之忻以喜黃獨隨長鏡  
重為詠歌始

贈森槐南博士

少微垂曜接蓬萊海國龍門一扇開家學鯉庭山谷集仙班鸞掖秘  
書臺卽今風雅無盟主自古文章有霸才惆悵榛苓搖落盡買絲願  
繡使君來

異苔氣味感同岑塵世難忘是賞心名士過江成往迹騷人末路託

行吟卅年駢囊中穎一曲流連海上琴欲挹清芬空仰止青山南  
麓白雲深

思古詩社集詠賦得鄴下懷古

漳河流水碧粼粼銅雀無靈又劫塵剖漢三分知地利感甄一賦瀆

天倫君臣禪讓同兒戲父子文章見性真賣履分香教故伎奸雄死

亦可憐人

伯亮按思古詩社師留東時與黃郁諸公所創立彼邦詩人森槐南永坂石埭永井禾原諸老咸入盟焉黃公任軒曰夫使日本風雅士知吾國詩

學尚未中絕者端推此社其言見東方雜誌八卷一號詩選欄

春柳

未堪綠錦製宮袍怕折柔條感鬢毛  
綰我騷情三月暮牽人別恨一  
春勞長堤翠拂花聽穩野店青分酒  
旆高化絮化萍皆小劫雨絲風

片夢江皋

送徐泰初之長崎

南州徐穉漢清流乍接蘭言意便投折柳誤題詩  
虎讖舉杯愁典酒龍箒千秋貨殖史公傳一代文章  
太子樓才得相逢又相別暮雲春樹海西頭

贈王韜菴

芳草思君子風懷託楚衡能詩孟東野有弟謝宣城  
辛苦名山業艱難宦海情卽今論著述安石繫蒼生

昨夜高軒過今朝李賀詩論文知己少懷刺謁君遲  
詞賦哀中歲干戈累昔時風塵一掬淚揮灑莫相疑

戶塚村新居卽事

人間何地有丹邱聊愛村居散客愁  
一澗水分千杵碓萬峯山隱幾  
家樓夕陽上樹看歸鳥春雨扶犁聽叱牛  
自嘆中年搖落意田園終老更無求

戶塚村新居本事絕句

綠窗雙燕話呢喃莫遣閑情手自撓  
惆悵春陰人瘦損小樓寒襲紫蕉衫

閉門無意問陰晴有客來言故國情  
歲曆不同春暗去天涯今日又清明

水田雨後有倉庾人在鄉關夢裏行  
如此江山非故國櫻花紅處看

春耕

東風懺恨綠參差南國瓊英渺所思解識王孫春草意凭欄不語立

多時

夢墜觚棱見二星吳山越水一鐙青層樓旅火春殘夜剪燭談詩與

鬼聽

時與郁曼陀同舍

暮雲不動罨層陰野樹荒村入夜深幾處鄉音孤客感四廂鐙火故

圍心

笛裏伊涼感慨多可堪中酒更聞歌晚風微度南朝曲揉碎春華奈

爾何

鐙燼香銷抱枕眠不堪哀樂感中年勞人如夢春如影怕讀南華第

二篇

讀史

一飯千金報窮途  
敬受恩當時漂母意  
容易感王孫  
殺爾原無罪  
空梁落燕泥  
機心生五字  
有句莫輕題

卽事

一夜山溪雨  
他鄉感物華  
亦知春去盡  
落枕數聲蛙

不如歸行并序

不如歸禽言也日本稗史引莊子寓言十九之義以紀國中  
一棄婦事婦生高門既嫁失歡於姑復為壬人所訐賦大歸  
歸以憂死其婿從軍在外不與知也自來日本聞人言之詳

梨園又曲寫其景狀哀怨中於性情觀者泣下蓋距今十數  
年實有此棄婦其人者稗史特諱言姓氏而其所傳之姓氏  
遂弗真紀之失實故亦不著唐時公孫劍器潯陽琵琶詩人  
以寓憂騷感慨之志僕也竊取其意作不如歸行嗚呼日本  
禮教來從我國隋唐間至今家庭日事猶有相髣髴者撮其  
大略播諸歌詩則此邦風俗之遺藉見一二他日采風君子  
倘有低徊往復誦之而感嘆者乎詩凡千有八言

花開花謝春彈指美人薄命花相似杜鵑哀喚不如歸禽言好續傷  
心史東方有國古蓬瀛侯門生女貌傾城畫戟金貂誇貴闕青琴碧  
玉傳芳名靈萱泣露遺金珎便識人生有死別宛轉難溫後母心碧

齡貴主同孤孽十載家庭絕可憐玉臺幸詠桃夭篇射屏選中風流  
壻卻扇迎歸美少年廡內麒麟真將種穀主勳襲金門寵顧曲周郎  
韜略深畫眉張敞恩情重國俗新婚愛遠游春山采蕨度溫柔紫姑  
不作釵飛卜翻笑秋河隔女牛此時匹鳥憐同命踟躕無端暈梟貌  
媿語曾通徐淑書野心欲破秦嘉鏡更有人間未嫁娘私圖禁鬱奪  
東牀邯鄲豪賈羨門戶但求姻姪聯金張愛河薦地波瀾起射工雙  
弄舍沙枝依稀妖夢感鴛鴦分明瓦墜香閨裏香閨風露虐清愁養  
疴偕隱海灘頭紫燕去巢空墨靜青蠅止棘讒言投高堂愛子恩何  
薄南山有鳥叫姑惡花豸繞施薨尾傷春駒已被蛛絲縛秦樓鎖玉  
竟何知私誓香囊志不移闌草嬉春嘆獨活折花插鬢憎將離兵書

暗趣紅顏老誰家夫婿封侯好不知此別卽人天臨行尚囑郎歸早  
懊儂樂府咸陽橋築爐茶竈伴涼宵憂深女化望夫石病廢姑頌出  
婦條阿耶憐女遺捐棄迎歸不道婿家事扶病登車說省親須臾續  
憶家門至門前歷亂女兒箱耶孀弟妹紛成行自知棄婦始今日側  
身西望摧肝腸莎蛩咽露秋心碎慙愁賴有姨家妹長臨病榻說征  
人雪藕牽絲纏舊愛含情將意寄襜褕暗傷身世異羅敷寒衣不織  
機中字素心比月天邊孤游絲續命三春絮信步閒巡海濱去江山  
依舊忍凝眸歷歷隨郎行坐處悲生秋扇非蒸梨轉眼蓬山路已迷  
幽夢但能託魂魄香軀何惜投鯨鯨離恨天高不盈咫縹緲靈臺海  
雲紫未了三生一面緣蛾眉那得從容死白頭老父戰場回手攜嬌

女共徘徊聊紆驚鴻分飛痛閉眺山川風景來中途忽覩檀郎面伯  
勞飛燕重相見車聲碾恨喧如雷人影流光疾於電凭窗遙見郎相  
呼雙頤虛翕聲模糊片語未通人去遠斷腸鐵笛吹烏烏從此香桃  
鎖骨瘦藥店龍飛長夜漏金谷蓮燈病綠珠錦衾鮫淚拋紅豆春蠶  
垂死絲有餘纏綿自縛傷何如牢未定情金約指密修絕命玉璫書  
沈沈嬌喘呼姨母襟底瑤函持在手此書為我寄征夫含笑黃泉感  
不朽重將約指與姨看朱櫻微破青梅酸玉魚金盃殉寒骨不如此  
物歸桐棺塵寰那有埋愁窟到此悲歡一齊歇繡戶酸嘶鐵馬風琳  
窗冷掛銀鈎月人唱刀環衣錦歸哀箏音澀十三徽去時曾記道珍  
重執手臨歧不忍揮玉煙珠淚華胥夢回首車窗空一恸翠羽誰銘

鏡裏鸞青山早瘞釵頭鳳卑松短柏護新阡墓中人見郎來前滿地  
女蘿山鬼泣探懷索得蕭娘牋展書苦讀弗成語淋漓淚墨人何許  
風吹木葉戰秋聲不是離魂來倩女夫妻恩義重人倫一朝棄擲誰  
為親漢皇求劍懸故物樂昌合鏡重前因靈媧不補情天缺東邦兒  
女皆嗚咽歌場齊唱蔡中郎鐵板銅琶淒欲絕斷墳憑弔清川西墳

旁烏柏哀禽棲參飯年年作寒食行人猶聽杜鵑啼

伯亮發師在日本  
此詩刊有單行本

故未存稿民國二十二年癸酉黃文仁軒自河南大學以其行篋中舊藏一册寄  
贈當時錄載新無錫日報二十周年纪念刊中丁丑之厄刊本失去茲從報紙鈔得

附題詞

森大來 槐南

白傅歌行感淪落梅村樂府繁桑滄干卿底事鵑啼血一曲哀絃  
爾許長

嘉耦由來怨耦初  
海枯石爛究何如  
子規紅遍蘆花雪  
便是蕭娘訣絕書

藕斷絲連情未灰  
香魂欲返乍徘徊  
可憐空化思歸鳥  
不作蘆江孔雀來

紫玉成烟可要扶  
烏蘭譜就淚穿珠  
蛾眉甘為韓憑死  
多謝滕王蛺蝶圖

休管是非身後多  
不如歸去鳥啼過  
任君古柳斜陽外  
翻盡盲翁負鼓歌

劉烈婦詞

烈婦瀏陽劉烈士道一之夫人烈士就義長沙未幾烈婦殉

之其夫兄劉君揆一來索詩文為作長歌

血腥酸風肉糜雨鬼雄化厲跳且舞搏沙飛土來深閨齒聲咋咋訴  
冤苦大義復仇史可稽妾恨不為張茂妻韓市呼天傍屍死妾恨不  
為聶政姊商音淒楚入瑩篴西風一夕洞庭秋含冤飲恨尋夫去千  
秋留得湘纍愁吁嗟乎生人死人太容易芻狗萬靈帝何意

男景邁恭校字

楊楚孫先生詩集卷三

無錫楊壽杓少雲

別署衡憲  
一署楚孫

門人孫伯亮編訂

吳淞道中 起庚戌

十年浪迹類蘋花  
九渡滄溟興未賒  
滿眼江南桑梓好  
櫻桃時節又天涯

入都口號

駿骨今無價  
黃金舊有臺  
平生肝膽在三訪  
狗屠來

七夕卽事

涼露如煙半臂紗  
中庭雜戲進箏琶  
繁絃急管空蕭瑟  
河鼓無聲碧

漢斜

相逢行送孫頌院之官山東

憶昔相逢在鄉里短衣束髮從君始  
湛虛出冶騰風雷睥睨人倫兩  
孺子一年相逢在白門黃衫挾彈招崑崙  
聞雞我猶愧劉琨一年相逢黃歇浦  
篝燈永夜西樓雨一年相逢吳王臺  
君馬如龍我馬虺今年我又來京邑  
秋風浥露芙蓉泣狗屠一去燕市空  
與子相逢證車笠逝水流光十一年  
黃金華髮思絲絲蕩子流離尚湖海  
故人薄宦初風煙山東文物古鄉魯  
自昔民安耕鑿天文章治術無二用  
繡衣曾見參軍賢客中今日傷離別  
一曲悲歌唾壺缺魂夢遙飛岱岱雲  
不數陽關第三折君不見延平雙劍化  
為龍人生何處不相逢

微波詞

花銷英氣酒澆愁浪向人間說壯遊不盡中年絲竹意華鐙羅袖月

明樓

齊梁金粉殉寒潮詞客秋魂一例銷獨有燕支山上月照人眉無憶

南朝

一事平生悔讀書儒冠可溺信非虛蛾眉不識文人賤收拾釵環飼

蠹魚

閒情聊逐出山雲十載江湖說與君還似揚州歌舞日歡場愁絕杜

司勳

東藩

帶礪河山誓已遙東藩賜券蝕寒潮滕矰影落滄波靜茄角秋深朔

塞罽狙擊微聞韓再政宣威空憶漢班超  
禾油麥秀歌聲歇搔首寥  
天賦大招

酬孫希俠保圻

英英奇氣赤城霞俯拾紅塵五萬花  
情話故人綿夜雨文章庶子愛  
春華中年事業還絲竹落日關河王  
鼓笳一字橫飛私署俠書生今  
見魯朱家

早年藝苑識君名車笠偏逢十載盟  
入夜孤燈話瀛海騰霄雙劍躍  
延平百攻不破詩壇壘一笑同塵酒  
國兵詢賦哀時無小補江南愁  
絕庾蘭成

江山涕淚近如何携手新亭感慨多  
世事翻雲兼覆雨人生對酒且

當歌齊梁文藻愁中盡屈宋幽靈夢裏過貧賤論交須愛惜黃金無處買煙波

風雲氣盡惜鬚眉絕業名山未可知香草美人如我意  
薛羅山鬼誦君詩靈旗想見桓王廟臘鼓驚傳漂母祠  
吾道已非全或日萬方一概去何之

送汪贊卿廷襄入蜀

東歸海客又西征景倩登仙是此行暮雨啼猿夔子國清霜落木錦

官城山川雄麗還懷古財賦充餘可計贏

君管川中財儲事

莫漫臨歧揮別

淚河梁携手感蘇卿

薊門雲物鬱清秋衣上京塵記小留西泝長江方客路南浮滄海是

歸身遙知風義高嚴武可有詩情動陸游聽說薛濤箋似錦教行爲  
寄浣溪頭

答秦仲子

能詩願學杜工部嗜酒聊同石曼卿抵死顛狂三十載窮途知我有  
秦生

氣度淵淵百斛泉濟時應讓祖生先期君手定東南局容我山林臥  
十年

送華裳吉赴成都兼寄汪贊卿

慷慨華夫子耽吟杜甫詩君今西入蜀再拜浣花祠世路同天寶騷  
情逸拾遺自厓吾返矣有夢故人期

有興萍蹤集無端雁影單  
關山愁日暮風雨感宵闌  
歷歷京華夢行行蜀道難  
汪倫倘相問寄語勸加餐

不寐

朔風吹屋動欹枕鼓鞀聲十載江湖意都從此夜生  
殘燈一明滅鏡鼠自縱橫不寐懷鄉國寒衾耐五更

對酒三首

南山有猛虎腥風振林木嗟爾射獵人負矢窮山谷  
虎怒不可撓撓怒激相撲韜弓出叢莽養禍長此族背麓  
多農家問訊少雞畜東鄰老嫗子昨者山下牧月黑  
續燈明西鄰聞夜哭

蟣蝨處禪間亦曰此邦國吮人血與膏快意五鼎食  
昏昏自朝暮逐

逐日蕃息運爾機械心竭爾蠕動力因人以為生生死在反側殺身  
行自取蠢哉刺膚賊

信陵佳公子醇酒而婦人豈曰無良識乃自賊其身孤松蟠霜雪幽  
蘭發和春物既貴適性人亦守吾真真性一拂戾質幹乃其賓我行  
已云倦所思役風塵機巧日相接行路誰為親悠悠古人意俯仰淚

沾巾

和秦仲寬唐山見懷韻

湖海非吾意關山獨爾思懷人勞永夕行樂趁芳時應憶同斟酒還  
期共祭詩榛苓搖落感相見一論之

歲暮書懷

驚文誰買長門賦旅食還同退院僧  
久客逢年驚臘鼓懷鄉有夢憶  
春燈關河落日詩情遠風雪寒宵酒債增  
壯志總因愁病減摩挲雄劍愧吾曹

黃金臺

好士以黃金小覩天下士豈有士其人  
而為黃金死燕丹乃小兒狗屠亦豎子  
築臺置千金誰為燕謀此一語誤昭王  
士請自隗始我亦一士流狂歌入燕市  
但聞說黃金不見古臺址長嘯向青天  
雲橫太行紫

夜坐

寒星墜地儘空階月華深牆陰浸鬼燈  
冉冉自明滅

燕京雜詠

河洛星雲渺所思中原王氣走燕支兩京文獻三都賦變例新裁七

字詩

二千年事獨沈吟到此躊躇國士心高義不聞收駿骨古臺沙磧莽

黃金

黃金臺舊址問燕人不知也

手折芙蓉下九寰游仙無夢謁華鬘受書曾讀明亡史一角紅牆認

景山

景山即明煤山思陵殉國於此

莫向名園問廢興西風殘照冷觚棱霓旌影落昆明水八鳳排雲望

定陵

昆明湖八鳳亭排雲殿皆在頤和園

百族齊承養恩昂難斗擗拱天垣荃蓀遍地朱門沒遇客猶呼貝

子園

萬生園郡人稱  
山貝子花園

不見當年水部郎，歲星躔次避文昌。乾嘉耆舊風流盡，搖落江亭送

夕陽

陶然亭一名江亭昔  
工部郎江藻所築

長縑縮髮入時妝，東鰈西鷄化鳳凰。簪筆朝天須待漏，可曾顛倒著

衣裳

廷試留學生假辦  
朝衣局促萬狀

額帖分明榜姓名，黃金替鑄貴官纓。微聞奇貨通陽翟，聞於今有

倖卿

金店勢力頗大，漢書食貨志所  
謂因其富厚交通王侯者也

一擊神鷹已脫鞵，連天衰草薊門秋。從今才盡江郎筆，收拾彈文付

選樓

御史江春霖以  
劾親貴告歸

金張列戟氣如虹，帝里春華九陌風。十丈軟紅塵不定，香車寶馬總

忽忽

街市積穢塵沙蔽天  
車馬仍繹絡不已

鬢雲兩瓣似雙髻無縫天衣曳紫綃屏却南朝金粉氣  
靨霞紅暈海

榮嬌

旗裝傅紅粉縮兩  
瓣頭御長袍無褶

梨園歌舞簇金蓮一片氍毹屬叫天若使開元終不改  
白頭供奉李

龜年

伶人譚鑫培一稱小叫  
天今老矣猶傾動一時

三月章臺揚柳青飛花隨水化浮萍  
可堪中酒城南路吳語輕柔側

耳聽

庚子後伎  
多南籍

匝地笙歌動九闌蝦蟆陵下問平康  
胡笳十八傷心拍兩字清吟署

教坊

娼寮門書清  
吟小班四字

青雲阿閣曲欄凭眉語殷勤喚欲  
磨解得瑤琴絃外意喫茶齊上第

三層

青雲閣茶寮名  
倡女時集於此

皇都人物總非凡，竟有貂蟬列舞衫。  
神女生涯膺上第，文科學士署

頭銜

時妓有魁花選得稱文學  
士者京師人才我知之矣

清歌艷拍鬱輪袍，履舄縱橫夜會高。  
一種風懷銷不盡，酒闌猶進鄭

櫻桃

嬰童名像姑音轉為相工民部雖頗  
禁令士大夫狃於惡習猶潛狎之

家國存亡一注孤，清時雅戲擬呼盧。  
只今庶姓無豪舉，百萬輸錢劉

寄奴

近禁民間麻雀賭徒重  
門深院過而問者誰耶

街鼓沈沈漏箭催，鈿車載夢夜深回。  
重城雖設金吾禁，體貼人情一

扇開

正陽門夜開一扇放入出  
入曲院歸車向曉不止

雕輪輾地走春雷，小駟如龍道路開。  
不數五陵裘馬貴，郎官端坐退

銜來

一縷涼侵白袷衣  
井梧寒雨掩雙扉  
他鄉景物關秋意  
簾捲西風燕子飛

題陶舟翼先生世鳳龍園授飯圖 起丙辰

歲星搖落龍潭夜  
驚起蓬門擁髻人  
一飯窮途忘不得  
焚香浣筆寫真真

千金投瀨任浮沈  
豈是當年進食心  
我謂先生風義古  
驕人富貴笑淮陰

傳神犬吠月明中  
寫到秋毫笑畫工  
縈我兵間十年夢  
荒村乞食窮門東

精誠金石格能開不是仙姝入夢來別有微言闡佛理心花凝處現  
蓮臺

題陶遠三松菊猶存圖

傲骨飽經霜虬枝歷歲長高風懷靖節秋意寫柴桑本是君家物猶  
聞墨妙香停雲麝未得詩思託微茫

題陶遠三五柳圖

先生門栽五株柳風微人往今何存陶侯詔我圖一幅令我惻惻蕩  
秋魂古人今人不相及五斗米且長子孫有誰蒿巾漉美酒有誰讀  
書秋樹根展圖思古發幽情夢寐想見柴桑村蒼然秋色滿天地千  
載猶守家風敦結廬人境本斯意澹泊明志布衣尊君不見尚書紅

杏將軍樹凌雲一笑何足論

題畫

萬壑松風託素琴  
薜蘿一徑白雲深  
眼前塵夢昏於墨  
竹杖芒鞋何處尋

聞道黃冠事采薇  
又看東海水橫飛  
人間那有桃源境  
只問江南吳布衣

題清芬益壽圖

高節清彌永  
孤標久自芳  
餐芝人不老  
春酒介千觴  
畫本多生意  
詩篇各擅場  
漸無廣微雅  
為補白華章

公園違孫頌院談燕遊事別後奉寄

王孫寥落送春歸又浣京塵拂素衣一笑相逢作狂語鼠肝蟲臂亦  
何微

文壇儘夠此生狂策馬金臺宿草荒畢竟清才非俗吏新詞傳徧白  
丁香

屋瓦自驚天自笑與君重論定公詩西京人物一丘貉漫託文章狗  
監知

飄蓬身世費商量雙劍雲霄事渺茫不盡十年湖海意綠莎亭角話  
斜陽

題王雲軒鶴先德遺墨

蒼然秋色滿橫塘古塔扶雲倚夕陽行旅不驚烽火靖石尤風裏夢

家鄉

蕭疎幾筆雲林畫不盡終天風木思我亦少孤行役早含毫凝睇為  
題詩

關心

到眼關心極霜楓幾葉丹蕭然生意歇又是小春寒怕看燭搖影微  
聞海有潮大千藏一粟還覺酒杯寬

卽事

棋事纔修興未降湖波送綠上吳艘東皇欲駕春駒去野菜花開白  
蝶雙

漫書遣興三首

莫學祠宗痛哭且為工部窮吟茶竈藥爐酒甕筆頭劍膽琴心  
一日不如一日千秋更有千秋蝶夢今生已矣靈犀隔世猶留  
九州東南西北一年春夏秋冬堪笑井蛙藩燕那知風虎雲龍

題溫倩華女士重九雅集圖

溪山如畫一登樓况是清遊九月秋若比桃園春夜宴掃眉才子亦  
名流

樓外風雲接杳冥樓中人自闌娉婷祇愁簫管都無賴捲入秋聲不  
可聽

俊游莫惜秋消瘦簾外黃花畫裏人俗粉庸脂刪略盡平添黛色到  
西神

黃絹誰徵幼婦辭素練還寫美人姿湖山佳話流傳徧為唱西崑萬  
首詩

題異禽圖

程君頌嘉得二禽朱冠白羽雞頂鵝趾為圖以志其異頌陀  
介予為題詩適靛厂過我曰二禽死矣雌者死於產卵其雄  
則哀鳴不食而殉之也余喟然曰有是哉是異禽也抑又可  
謂之義禽馬賦詩哀之即寫於圖

鴛鴦同命鳥而汝獨無名食息關飛動艱難託死生雄冠天日表素  
羽雪霜清等是藩籬寄悠悠感世情

甲子殘臘圍城紀事六首

笳鼓隨秋盡殘冬復戰爭黃羊方祀竈青犢忽塵兵烽燧編氓屋金  
縵列將營覆巢猶戴德完卯宥孤城

徹夜連郊火嚴城八日圍地窮螻蟻穴天懾虎狼威世亂身安寄憂  
深命轉微千家聞野哭風雪苦無衣

維吾家叔子披髮救鄉鄰匹馬短衣夜寒風朔雪晨繼城師燭武守  
土慕張巡賴有婆留氏同心此二人

軍書連夜下捧檄使君來城北公誠美河陽花亂開摸金須置尉避  
債莫登臺終讓林和靖天心數點梅

數典不忘祖將軍說關王壓驚雖有酒續命竟無湯葑屋錙銖盡瓊  
筵劍戟張忽聞旗報亂車騎走倉皇

錫也何曾有山靈亦自疑我生多難日天新太平時寒角吹宵迥春  
燈入夢遲雲霓翹首望破涕見旌旗

題卞玉京小像

南都金粉殉王孫雲散風流感白門莫訪祇陀菴畔路紫蘭香徑為

招魂

按梅村詩卞玉京墓在惠山祇陀菴錦樹林之原  
卽今之嚴家棚左近也曹君衡之曾往訪之不獲

絕代消魂祭酒詞畫中人想妙年時青燈古佛抽身早不比邢娘晚

入縑

陳國圖本姓邢漢  
潘變前披縑入道

題范衡伯師萬樹梨花館詩集

芙蓉山館數吾家絕豔驚才鬪八叉兩宋三唐商略徧百年嗣響萬

梨花

晴川漢樹少年場  
弔古金臺鬢已蒼  
兩戒山河羅眼底  
一齊收拾付奚囊

詞人自古如名將  
老子胸中有甲兵  
萬樹梨花森戟衛  
長留一卷據詩城

物運搗麝短長吟  
詩到溫柔見道深  
中有哀時憂國淚  
美人香草是騷心

連年鄉國苦兵戈  
唱入商聲變徵多  
不信文章關世運  
開元朝事話宮娥

師門著作春秋例  
游夏何能贊一辭  
可與言詩矜寵甚  
寒燈青憶昔年時

孫伯亮以晴梅館遍徵題詠為賦五律一章勉附諸家之後  
種梅營小築高館擁書城開徑寒香動臨也快雪晴花宜蟾作伴夢  
與鶴同清若問孤山約林家有舊盟

男景邁恭校字

重印後記

溯先君棄養，忽忽三十有一年矣。先君生光緒五年己卯，迨今歲八月為九秩冥壽，予執教台灣，適遠遊北美，且不獲親謁墓門者，亦已二十餘載，遙瞻故里，愧負親恩，不禁愴然泣下。

先君少雲府君，號楚孫。先曾祖竹溪府君諱鎮，先祖字雲府君諱宗濬，俱封中憲大夫，親督憲課，兼授詩詞，故先君自幼即朗朗吟詠，七步成章，鄉里延譽尤盛。及長負笈東瀛，倡立詩社，一時唱和者莫不為之傾倒。迨返國出其所學，游於京師，不獲展其長。值滿清遜位，

乃襜被南歸，服務桑梓，肆志新聞事業，符合時代需要，首創「錫報」，旋又獨資創辦「新無錫報」，啓迪民智，領導輿論，享盛譽達二十餘年。丁丑先君見背，予尚幼讀，先人手創事業無以賡續，負疚之深，耿耿至今不能釋。

孫子伯亮從先君服務報社十數年，嗜讀書，尤喜詩詞，先君錄為弟子，時加誘導，亦卓然成家。自先君下世之十年，曾獲輯詩集三卷都二百二十首，延約親友，獲付剞劂。予違難來臺，行篋所携，僅存孤本，值茲先君冥壽，爰亟重付影印，奉贈海內外尊長親友，藉誌紀念。

，兼廣流傳，如邦人君子尚有度藏 府君遺稿或函札手澤，切懇不吝賜知，倘他日得增刊再版，則尤為馨香企禱者也。

民國五十七年甲辰十月十日 無錫楊景邁敬識

